

四庫全書

史部

欽定四庫全書

史部  
山西通志卷二十二

詳校官監察御史臣查善長

檢討臣德生覆勘

總校官進士臣朱鈐

校對官編修臣勵守謙

謄錄監生臣黃嵩齡

欽定四庫全書

山西通志卷二十二

山川

六

朔平府

右玉縣

駱駝山在縣東三十里兔毛馮營二河源此

盤石嶺在縣東四十里

蹄窟嶺在縣東五十里高數十丈遞高十里盤踞三十

里連左雲縣界高山堡北連邊牆三十里上有三峯  
相傳漢王昭君出塞道經此嶺有馬蹄跡至今尚存  
紅土嶺在縣東南十五里

牛心山在縣東南四十五里牛心堡南遞高八里旋折  
而上孤峯挿雲盤踞數里巔平麓圓上建玉皇閣四  
望無際左右開黑石二峽欽欽空洞似牛睛然土人  
曰此牛心孔竅也冬不積雪夏不生草山下清泉澄  
澈潺湲號為勝地



大南山在縣南三十里咸遠堡東北十五里形如華蓋  
高百仞遮高十里四周盤踞四十里一名賀蘭山又  
名賀人山山半有元洞中豎孝文碑記夏拂涼颺冬  
涌溫泉邑勝地也 宋咸平初李繼遷犯河東西境  
知石州韓崇訓追襲之至賀蘭山而還

蕭通元洞在縣南三十里大南山陽洞口高四尺邃六  
尺蕭通元土人傳第八仙云

長雞嶺在大南山

黃土山在縣南五十里

碧峯古洞在縣南九十里平魯縣界土人傳真仙棲此  
張良洞在縣南百里土人傳張良棲此未覈豈白登之  
役嘗扈從而至止耶

紗帽山在縣南威遠堡東二十里下有海窟廣一畝水  
殊澄冽

石香爐峯在縣南威遠堡西二十里三山鼎峙

泥溝山在威遠堡南五十里山多文石具山水花木形

琢而成器

尖山在縣西南威遠堡界尖峯疊秀中有聖水堂禱雨  
輒應一名聖水山

盤谷在威遠堡西

雷公山在縣西十里高二十丈有奇延袤數十里北連  
邊外南接雲石堡下有神泉禱雨輒應 峭巖深澗  
山巔白石久曠則色燥似焚將雨則潤生似礎

鶯窩山在縣西十四里高峯矗起陟巔可眺百里旁列

小峯四

華林山在縣西三十里

歪頭山在縣西三十里楊千戶河源此

總瞭山在縣西四十里雲石堡界

混元峯在縣北二十里殺虎口東高十五丈東北脊連  
邊外盤踞數十里上建元帝宮山半有清泉乃廣義

河之源也

楊鐵山 黃家山 邊家山 平桓山 玉林山 臺

印山 東團山 氈帽山 聖山

以上九山胥在右玉見大同紀

長安嶺

芒牛嶺

二嶺胥在右玉見大同紀

無二山

石堂山

桃山

紅山

以上四山胥在咸遠衛見大同紀

東大河在縣東南發源左雲縣界北流入南大河

南小河在南關外發源縣東蹄窟嶺暨東北風神臺後

柳溝泉

南大河在縣南三里即滄頭河東河也

雙河在縣南四十里雙河屯發源村西南山泉

滄頭河在威遠堡南百五十步發源平魯縣西泉兒山東流折北入縣境經威遠城南門外環西而北滙滄水經縣西門外滙馬營兔毛諸河出口入黃河

十八灘在威遠堡西澗迴泉繞廣袤數十里土人修禱於此所謂盤谷流觴也

聖水潭在威遠堡西三十里尖山麓左有天橋右有龍灣禱雨輒應

楊千戶河在縣西雲石堡界發源西三十里歪頭山繇

秦家堡經西門外入馬營河

馬營河在縣北七里發源東七十里左雲縣界橐駝山下師家口西流至城北匯滄頭兔毛諸河出口外

廣義河在縣北十八里發源樊家窰混元峯半潺湲秀澈流至殺虎口南門外匯兔毛河馬營河出口外

兔毛河發源東北十里橐駝山下響水溝西流至城北八里會馬營諸河流出口外東勝州入黃河

柳溝泉在縣東北風神臺後利可溉圃

三家河

王石匠河

蕭官人河

石溫泉 紅草泉 東流泉 三里泉

晉見大同紀在右玉

打魚河 見大同紀在威遠堡

朔州

神武尖山在州東南百餘里即武州山之別峯也昔賀

拔氏宗族居此



阿敦山在縣東南金羅索族子哈里從羅索追及遼天  
祚於朔州阿敦山天祚從數十騎逸去羅索遣哈里  
及珠德勒往見諭之使降天祚待於阿敦山之東羅索  
因獲之

禪房山在州南七十餘里遞高八里巔覆雲輒雨  
輓轡坪在禪房山西

梨園山在州西南六十里連寧武軍山

翠屏山在州西南七十里寧武縣界東至石碣峪北接

馬駿山南通寧武軍山口西至托羅臺高下往復二十里有奇盤踞二百里有奇山數平峯有石洞洞有石佛盛夏陰崖積雪

石碣峪在翠屏山東

蔣山在州西南八十里

東靈山在州西南百餘里舊武州境接寧武山界金蕭融為武州刺史嘗建亭臺霍鵬朔州城樓詩但說東靈蕭刺史那知北塞晉陽侯

蜚魚洞在州西二十五里

單于嶺在州西三十里鞍子嶺北

門家嶺在州西三十里高漫坡十五里南連魚渠嶺北  
連黑梁山

小峪在州西三十里小北岔草木不彫風景長春

魚渠嶺在州西三十五里盤道高五里南連雙嶺北連  
門家嶺石上有魚形

雙化嶺在州西四十五里石道高五里東西盤踞百里

有奇西連安子坪北連魚渠嶺中有石道日西靈光  
回照

西華嶺在州西五十里遞高十里盤踞四十里東連鞍  
子魚渠嶺一名黃華嶺盛暑猶寒 史記趙武靈王  
之代北至無窮西至河登黃華之上正義黃華蓋西  
河側之山名也

鞍子嶺在州西六十里西山後高四里西連西華嶺形  
似馬鞍

北岔在鞍子嶺東北

三塔峴山在州西北二十五里高四里餘盤踞二十餘里西連黑梁山山半有泉名聖水井禱雨輒應建三塔鬼泉祠有三塔西塔尤高

黑梁山在州西北三十里高十里餘盤踞四十里東連三塔峴山南連門家嶺西北胥連土坡出羣山表俯瞰百里上有唐豐王墓 通考唐昭宗第三子名祁天祐元年封薨葬於此墓前石砌神道四周有濠塹

遺跡

顧北嶺在州西北四十里高十里餘盤踞二十五里土  
人有母嘗被俘子日登嶺望母後葬於嶺故名

另山在州西北六十里高漫坡袤十里盤踞六十里四  
周胥連土坡

龍虎山在州西北九十里一名上木角唐鄂國公墓在  
此

元姬山在州北三十里高五里餘盤踞二十餘里後

魏道武侍姬李氏善謳卒葬此山故名

寶峯山在州北四十里高五里餘盤踞二十餘里南連  
安家嶺坡澗 明嘉靖間山麓傾現石佛像二一老  
一稚備具神工其光似玉其響似金民建寺於上故  
名

玉屏山在州北六十里高漫坡十里餘盤踞二十五里  
州志金李純甫居此自號玉屏山主人日與禪僧

士子游以文酒為事

按蔚州有玉屏山乃李純甫所棲也宣純甫亦嘗僑朔耶

彈子山在州北八十里漫坡十里餘南連平魯王冒兒  
窰石坡

卧龍岡在州北

苗家山在州東北三十里石磴裁通人行透高十五里  
盤踞四十里東南連洪濤山西連土坡北連契吳山  
契吳山在州東北五十里高十餘里盤踞三十里東北  
連洪濤山南接苗家山西土坡

七嶺山後魏永興五年七月丙戌南次定襄大落城東



踰七嶺山田於善無川

臘汗山庫狄干曾祖越豆眷魏道武時以功割善無之  
西臘汗山地方百里以處之後率部落北邊因家朔  
方

大青山東接察罕兒界迤北而西直抵襖兒都司以黃  
河為界北有數口胥通大漠高百餘仞袤三百餘里  
廣百餘里中產松柏材木望之蒼翠似畫屏按後漢  
書五原郡西安陽北有陰山徐廣曰陰山在河南陽

山在河北括地志陰山北戎地在朔州北塞外匈奴  
依阻其中漢武克之置陰山縣遼史豐州振武縣漢  
定襄郡盛樂縣背負陰山前帶黃河元魏嘗都此明  
一統志舊通志古豐州境有黑山與雲內州夾山東  
西相連大青山即陰山黑山而夾山即紅山摩天嶺  
諸山也又芒於水南逕鍾山水經注曰山即陰山歸  
化城元延祐間修道碑載大青山為祁連山邊外稱  
天為祁連金時置靜州天山縣故名大青山為祁連

山水經河水自臨河縣東逕陽山南陽山即陰山也山在中國之極北故名陰山水北曰陽山在河水之北故亦謂之陽山徐廣云陰山在河南陽山在河北非也

天德山在朔州北遼太祖平黨項遂破天德軍掠吏民以東即此若漢李陵自居延行至天德山在今甘州西北非歸化城近地也

牟那山在朔州北三百里隋大同城址在此近有耳鬣

城又有秦長城

夾山在朔州北三百四十里遼主天祚避金師奔夾山  
即此

黑河發源大青山東九十九泉經歸化城南二十里西  
流至脫脫城西南伏流入黃河 水經河水屈而流  
白渠水注之 水經注水出塞外西逕定襄武進縣  
故城北西部都尉治王莽更曰伐蠻世祖建武中封  
趙慮為侯國也白渠水西北逕成樂北郡國志曰成

樂故屬定襄也魏土地記曰雲中城東八十里有成  
樂城今雲中郡治一名石盧城也白渠水又西逕魏  
雲中宮南 明一統志黑河古豐州界源出官山西  
流入雲內州界至東勝州入黃河 漢志雲中郡武  
進白渠水出塞外西至沙陵入河 雲中郡武臯荒  
於水出塞外西至沙陵入河 元朱思本得帝師所  
藏梵字圖書黑河源自漁陽嶺之南水正西流凡五  
百餘里與黃河合

桑乾河在東距州四十里

鄯河在州東五十里

泥河在州東七十里州西五里

沙楞河在州東南三十里脉通海眼日夕水潮流經貫

家莊

三泉在州東南六十里泉三圓胥盈輪深不可測

南泉在州南五里

灰河在州南五十里源出寧武軍山口至紅崖兒村伏

流十五里至塔底村南湧出經城南五里至馬邑入  
桑乾峪土人名南河又名蔚李河在南五里又東流  
距州四十里

楊泉在州西南九十里嘗有鯉魚化虹之異

七里河在州北七里出洪濤西北山下流經酸刺村東  
南合灰河土人名北河 流經東七里有洲似臺流  
水周環濤瀨不少湮相傳日晡恒見美女垂釣焉

吁澗河在州北十里發源團堡西一名河東河在州東

金匱要略卷二十二  
卷二十二  
十五里一名七里寨河在州東北七里

臘河在州北二十里洪濤山之陽水連桑乾

寧邊河在州北二百餘里西流後魏皇始元年春正

月大蒐於定襄之虎山因東幸善無北陂

聖水井在三塔峴山下潦不溢旱不涸禱雨輒應

御井在州北古城內相傳劉武周開

東井在城東南隅

南井在南門內



西井在西門內城中東南西三井與御井水胥清甘

馬邑縣

太和嶺在縣西南五十里

雁門關山在縣東南六十里代州界關下至廣武即馬邑界

紫金山在縣南五十里遶高二十里有竒亘數百里連筆架山東西胥接代州境險峻盤踞相續不絕

筆架山在縣南五十里

余都谷在縣南山陰界

雙化嶺在縣西七十里界連朔州

雷山在縣西北十里高三里盤踞八里西接朔州元姬

山山有六峯下有源泉出焉

洪濤山在縣北十里雷山東高三里盤踞八里連雷山

西接朔州元姬山上有五峯下有七泉湧出名黃道

泉土人又名洪濤泉即灑水也一名神頭山巔有神

婆遺蹟土人傳神姬攜子遊山因留蹟手足暨梳篦

胥印石深入一寸又名神婆山又名漂頭山 水經  
注濕水出於累頭山一曰治水泉發於山側沿坡歷  
澗東北流出山 漢志注陰館樓煩鄉景帝後三年  
置累頭山治水所出東至泉州入海過郡六行千一  
百里莽曰富代 金志馬邑有洪濤山漂水又曰桑  
乾河山下有桑乾河神廟碑刻具存

馬頭山在縣北十五里高三里盤踞十里西連洪濤山  
列朔州苗家山左山有三峯中峯尤高形似馬頭

洪濠峪在縣東北十里

黃榆岡

桑乾河發源黃道泉金龍池二水匯於喇河復流經縣城西南東三面西至鄯河東入山陰縣河陽堡界

桑乾水發源喇河口西北至洪濤山黃道泉與金龍池水合流至邑之西而南而東至鄯河三十里下流少緩沍寒成冰自鄯河以西至西郭又北至水源胥不冰烟霧恒似瑞雲焉 祝志按水經其河源自汾

陽燕京山之天池伏流至朔州馬邑縣雷山之陽滙  
為七泉曰上源曰玉泉曰三泉曰司馬洪濤曰金龍  
池曰小盧曰小浦七泉合流於新磨村是謂桑乾河  
經小泊村至縣治西又經水磨頭新墳西河底榆林  
鄆河泥河諸村東南流入山陰境朔州北有七里河  
西北下峪有臘河南山有灰河及雁門關太和嶺諸  
水自南而北者悉歸之過應州則渾源水自東來又  
沿弘州之襄山至順聖則葫蘆河水注之經廣靈靈

仙定安而西以至灤陽之陽河懷來之瀉河又滑石  
之水自東北來者及山西之水皆合是為合河至宛  
平縣境分而為二一從葫蘆河東南入海一從金口  
絡至都城東合白河入海此河之源委也 桑乾河  
繇陽高入直隸境順聖西城歷順聖東城保安州而  
東南流至懷來南入縉山出水關入宛平縣境以出  
蘆溝橋東南至看丹口分二支一流至通州高麗莊  
入白河一南經固安縣至武清縣小直沽與衛河合

流入海 水經濕水出雁門陰館縣東北 水經注  
濕水出山逕陰館縣故城西縣故樓煩鄉也漢景帝  
後元三年置濕水又東北流左會桑乾水縣西北上  
下洪源七輪謂之桑乾泉即潦涓水者也耆老云其  
水潛承太原汾陽縣北燕京山之天池桑乾水自源  
東南流右會馬邑川水水出馬邑西川俗謂之磨川  
其水東逕馬邑縣故城南東流桑乾水 後魏昭成  
二年五月朝諸大人於參合陂議欲定都灤源川連

日不決從太后計而止二十二年東巡至于桑乾川  
登國二年十月幸灤源 天興三年五月至馬邑  
觀灤源 泰常四年五月至灤水觀魚 通考後魏  
景穆帝立五嶽四瀆廟於桑乾水之陰 遼統和二  
十二年十一月至桑乾漁獵 元成宗加封桑乾河  
神廣濟王制朔州桑乾河源會雁門流通馬邑可加  
封協應廣濟王 元至治三年二月治桑乾道 泰  
定帝二年閏正月治桑乾道



灤水源出馬邑即雷山洪濤山下之淵泉桑乾之源是也漢書謂之治水水經注謂之潦涇水五朝志神武有桑乾水元志蘆溝河其源出於代地名曰小黃河以流濁故也

鄆河在縣東三十里

恢河一名灰河在縣南五里發源寧武山口北流經紅崖村伏流十五里至塔底村復出經朔州至縣南東流而北折入桑乾河春冰開合濟渡最艱

黃水河在縣南二十里

三泉二一在縣南五十里一在縣東五十里晉平地湧

出水清冽盛寒不凍

小泊泉在縣西北五里源出不竭蒲萍茂密

小浦泉在縣西北五里淵深不竭四周蒲葦殊茂

黃道泉在縣西北八里洪濤山下一名洪濤泉淵深莫

測相傳通寧化天池

上源泉在縣西北十里雷山前

金龍池水在縣西北司馬泊鄂國公廟前 後魏以來  
相傳池有二龍時化為馬一驪一黃天陰晦輒出田  
間北馬遇之生駒神駿或有角如鹿茸然後尉遲敬  
德嘗收而乘之馬奔欲入池敬德抱池邊柳柳為之  
旋蹟尚存又傳通懷仁縣金龍山泉 西北舊有水  
圍禪院扁曰水月如來四周胥水中構蘭若  
細蘆灣泉在縣西北一名戲龍灣泉源不竭派同金龍  
池水土人傳二龍戲此

玉泉在縣西北雁門山西一泓澄澈上建龍王廟禱雨  
多應

三跳澗北十里土人傳尉遲敬德乘馬策而東至西河  
底村溝澗橫列馬一躍而過者三

泥河在縣東北三十里

黑河發源大青山東九十九泉西流經歸化城西南入  
黃河一支繇縣北二十里喇河口流入桑乾河

左雲縣

李洪嶺在縣東三十里雲西堡界

焦山在縣東六十里高山城北孤峯突起上有寺緣空  
洞而下臨肖畫河土人曰肖畫之名殆為焦山設也  
石佛寺山在縣東九十里一名佛窰山迤東數武石窰  
噴水山即拓跋魏時石窰也

雙化嶺在縣東九十里大同界盤踞百餘里嶺西有古  
刹

龍王堂二一在縣東南三十里所謂龍巖呈秀也一在

縣北二十里山前有龍泉禱雨輒應二景胥可翫

大峪山在縣東南六十里雙峯對峙川澗中遶林木森鬱石炭滋殖袤亘數十里南通雁門關

紅羊峪在縣南四十里

四峯山在縣南六十里四山並峙突兀凌空連吳家窰東山接懷仁縣界

鷓峪在縣南七十里有鷓窠寺

孤山在縣西北二十里孤峙流泉上得泉而山不孤矣

橐駝山在縣北十里接右玉縣界

彌陀山在縣北四十里東西袤百里北連口外

黑龍王山在縣北四十里寧魯堡西峻峯截辟遠眺左

雲城殊似棋局

長城嶺在縣東北三十里迤邐不絕上有禦敵形蹟

馬頭山在縣東北八十里助馬堡界逶迤向東狀似馬

首兩耳尤肖陟其巔則邊外豐州灘威寧海松樹山

胥在指顧中美樹木不生炎暑恒寒一名長城嶺

東石山 傅家嶺 抗稜山 門家山 鷓窩山

五山  
胥見

大同  
紀

頭道河源出縣東三里站馬溝明副總兵趙奇所濬也  
馬家河在縣東廖家河之源

照天泉在縣東三十里雲西堡界西流注東南村村傍  
嶺下又有巨泉氣恒溫名溫泉村

紙房頭河在縣東四十里舊高山西南石壁湧泉北流  
折東



石窟泉在縣東九十里石佛寺山石竇噴水最清冽所謂石窟寒泉也王達善詩一派元從石罅來湛於秋鏡綠於苔

廖家河在城南源出縣東馬家河西流經南門外折北經武家園復折東環城南合渾河以入桑乾

馬頭河在縣南三十里發源石厰溝經臧家店黃家店至吳家窰東南流出大峪口

溫泉在西門外旁有小灘洹寒時草恒綠名半畝青

龍泉在西北孤山之陽左建龍神祠禱雨多驗泉水東流

肖畫河在縣北三里發源龍泉又匯西南諸涓流東流至舊高山匯紙房頭水遶高山城北繇雲岡折而南匯大同縣南十里之十里河

平魯縣

魁星臺山在東門外孤峯高聳戍兵護城

橐駝嘴山在縣東五十里東西二溝中有丘陵殊肖橐

駝嘴

赤公山在縣東南三十里，遶高八里，盤踞數十里，東連右玉界，南連朔州小峯山，羣峯蜿蜒。

黃草梁山在縣東南八十里，遶高十五里，盤踞百餘里。崇岡峻嶺，迴環盤繞，中多林木，界連朔州懷仁諸山。北嶽峯山在南門外，與北固魁星臺鼎峙。

天門山在縣南四十里，井坪城北界，高五里，盤踞數十里。峻嶺突峯，東西連朔州諸山，中為南北通衢，往來

時駐驂馬山下有石洞泉殊冽

十二連山在縣南井坪西南十五里打鷹溝諸村上有  
十二峯蒼翠綿亘巔為楊六郎寨

馬瞭山在縣西二十里相傳唐尉遲公瞭馬於此一名  
馬瞭溝

迎恩山在縣西三十里

寺懷山在縣西四十里遶高七里盤踞數十里連烏龍

洞諸山

烏龍山在縣西五十里兩山夾壑下有烏龍洞邃藏竅  
泉炎暑凝冰禱雨者獲滴露如珠雨輒降

大頭山在縣西北四十里盤踞數十里下有犬嘴溝樊  
家河響泉諸水乃湯西河之源也 縣東西諸水胥  
繇山麓流出口外

磨兒山在縣西北五十里山形險峻周環似磨古用武  
地也傍有碧峯古洞幽杳莫敢入今連縣北碾兒山  
磨兒當即碾兒

北固山在邑城內正北高十丈有奇背築敵臺憑高望  
數十里明總督翁萬達題名最高峯千佛洞寺壁相  
傳龍破壁飛去至今白石半片雅似鱗甲

王化山在縣北七里相傳仙人採藥於此

朔州嶺在縣北十里

碧峯山在縣北二十里三層洞北兩峯並峙中凹後突  
上建觀音塔可眺數十里

碧峯洞在三層洞觀音塔北四周胥山上有石洞

斷橋棲在北峯山上石巖壁立數丈中有石窰前有深  
塹懸板而進撤之則人獸胥不能犯

泉兒山在縣北三十里高五里盤踞數十里旁有牛洞  
溝老蛇溝石灣子王定窰海子穴諸山乃滄頭河之  
源也

碾兒山北三十里形似碾

紅山在縣北四十里遶高八里盤踞數十里土石胥紅  
石香爐嶺在縣北四十里巔平而方左右兩山夾峙形

似香爐

馬蹄梁山在縣東北三里山坡石有馬蹄跡深五六寸  
龍泉山在縣東北二十里龍泉寺村遶高三里盤踞數  
十里連右玉北山突岼東西二峯壁立上建寺

三層洞在縣東北二十里山有石洞三層相傳仙人採  
藥王化煉丹於此洞北明成化間建觀音塔

南山 雙山並峙

黑駝山在井坪所



中東山 西平山 呂公山 小青山 磨山相傳漢  
斬把委王於此有石洞胥在平魯縣

榆樹梁在朔平府境邊外遶高三里盤踞十里通平魯  
縣境邊外大榆樹灣小榆樹灣山險多榆樹

白道梁在朔平府境邊外遶高三里盤踞十里元魏征  
柔然嘗出白道 水經注芒於水西南逕白道南谷  
口有長城在右側帶長城背山面澤謂之白道南谷  
有城自城北出有高阪謂之白道嶺沿路惟土穴出

泉挹之不窮顧瞻左右山樹之上有垣若頽基焉沿溪亘嶺東西無極疑趙武靈王之所築也

紅山東接榆樹梁西抵喇嘛灣有紅山口 水經河水南入楨陵縣西北 水經注緣胡山歷沙南縣東北兩山二縣之間而出予以太和中為尚書郎從高祖北巡親所逕涉縣在山南王莽之楨陵也北去雲中城百二十里縣南六十餘里有東西大山山枕河河水南流脉水尋經殊乖川去之次似非闕究也

摩天嶺在黑城東高五里盤踞二十里

蜈蚣壩在大青山磧口通瓦喇諸地

半箇山 黑青山 照壁山 三山胥在平魯縣西邊

外

頭道河 二道河 三道河 胥在朔平府境邊外即

兔毛河水也西流經紅城一名紅河又西南流至岔

河口入黃河

七星湖在黃河東岸內有七水眼旋轉望之似星其餘

水泉水泊尚有數處土人多不知名 七星湖即古  
之所謂沙陵湖也

清水河在平魯縣邊外源出平魯縣邊內西北諸山經  
大水七墩二口流出口外合邊外諸水西北流至岔  
河口入黃河 水經河水又東南左合一水 水經  
注水出契吳東山西逕故里南而北俗謂之契吳亭  
其水又西流注於河

寧邊河在平魯縣西邊外

西澗泉在縣西南一里水湧上

泉兒溝在縣西北三十里大嘴溝村繇樊家河流出大水出口

石花井在縣西北三十里鑿石出泉

湯溪河在縣西北三十五里源出大頭諸山泉北匯大嘴溝樊家河響水泉流寢巨經大河堡水口出口外一名湯旗河一名湯西河

滄頭河在縣西北三十五里源出縣西北泉兒山郭家

窰繇牛洞溝老蛇泉兒諸溝東過石灣子碾兒山滙  
海子窰王定窰諸水成河繇三層洞南北流出縣境  
經威遠右玉滙兔毛河出口流入黃河 水經注中  
陵川水出中陵縣東南山下北俗謂之大浴山其水  
亦取名焉東北流逕中陵縣故城東北俗謂之北右  
突城王莽之遮害也十三州志曰善無縣南七十五  
里有中陵縣世祖建武二十五年置其水又西北右  
合一水水出東山北俗謂之貸敢山水又受名焉其

水自西北流注於中陵水又西北流逕善無縣故城  
西王莽之陰館也十三州志曰舊定襄郡治地理志  
曰雁門郡治其水又西北流又會一水水出東山下  
北俗謂之吐文水山又取名焉北流逕鋤亭南西流  
土壁亭南西出峽左入中陵水

響水泉在響水營泉繇石墜潭有聲故名流經大河堡  
後出口外

縣東南小泉 縣西北泉 東南數小泉旱則涸西北

數泉繇七墩大水口流出邊

海子窰在縣北十五里連家窰北有水磨流入滄頭河  
王定泉在縣北二十里王定窰流入滄頭河

七墩河在縣北六十里源出墩東西北流出口 水經  
注水源上承樹頽河南流西轉逕武縣故城南十三  
州志曰武縣在善無西百五十里北俗謂之太羅城  
水亦藉稱焉其水西南流右水注之水導故城西北  
五十里南流逕城西北名之曰故槃迴城又南流注



太羅河太羅河又西南流注於河

細水河 西南角泉胥在井坪所

姚河 趙河胥在平魯縣

寧武府

寧武縣

蘆芽山在縣西北九十里寧化堡北連馬龍山高橋山  
層巒疊嶂峻削壁立山下有淨水源入汾河

管涔山在縣西北六十里朔州南百二十里遶高七里

主峯盤踞五里東與燕京相屬西與林溪山盤曲相連山形中高左右卑如山字下有龍池為汾河源昔

劉曜隱此土人又傳文中子教授地

明一統志劉淵隱此誤

山

海經北次二經之首在河之東其東首枕汾其名曰管涔之山其上無草木而多玉汾水出焉而東注於河十六國春秋劉曜形質異衆恐不容於世隱迹管涔山以琴書為事嘗夜閒居有二童子入跪曰管涔王使小臣奉謁獻劍一口置前再拜而去以燭視

之劍長三尺光澤非常赤玉為室背上有名曰神劍  
御除衆毒曜遂服之劍隨四時而變為五色 大業  
拾遺記大業二年七月敕於汾陽西北四十里臨汾  
水起汾陽宮即管涔山河源所出之處當盛暑月臨  
河盥漱即涼風凜然如八九月十年四月車駕幸汾  
陽宮避暑宮地即汾河之源上有名山管涔高可千  
仞上千江山造亭子十二所其最上名翠微亭次聞  
風彩霞臨月飛芳積翠合璧含暉凝碧紫巖澄景最

下名尚陽亭亭子內皆縱廣二丈四邊安劍闌每亭繡方尺榻子一合山下又有臨汾殿敕從官縱觀

唐志靜樂有天池祠有管涔山 三關志北管州得名以管涔山也 元好問澤發水詩管涔汾源大車輪平泉丈八玻璃盆

燕京山在縣南二十里高三里盤踞五里乃管涔東峯也 一統志寧武有燕京山 十三州志汾水出武州之燕京山

染峪梁在縣東十五里高三里盤踞五里山色如染澗  
有蝦水經陽方口流入朔州界 霽色似染澗產蝦  
明寧武關志所謂染谷流蝦也

駱駝山在縣東南十五里高五里

陽武峪在東南崞縣界遼人侵耕陽武若地知并州韓  
琦鑿塹立石以限之

鳳凰山在縣南五里崞縣界

棋盤山在縣南六十里高二里盤踞三里山上有石盤

巔有青紅杆樹

石湖嶺在縣南明嘉靖二十年副總兵丁瑋戰歿於此  
鷄兒嶺在縣南明嘉靖二十八年總兵陳鳳追俺荅兵  
至此非宣府南之藥兒嶺也

仙人洞在縣西三十里遶高七里盤踞十五里有大石  
門小石門懸巖香爐峯袤延拱峙環山昏香葦也

分水嶺在縣西四十五里恢河源此

石門山在縣西五十里

清真山在縣西五十里蘆芽之支西距蘆芽巔三十里  
高八里山殊鬱秀形似屏巔有泉垂下懸珠噴玉號  
水簾山中有清真菴故名

高喬山在縣西六十里高十里蘆芽之支

虎頭山在縣西七十五里高三里盤踞五里形似虎踞  
高峻人不能陟六月積雪關志所謂虎頭積雪也

通考寧化有雪山建四寨當即虎頭山

馬頭山二一在縣西九十里寧化堡高三里盤踞五里

山下有水入於汾一在縣西百二十五里

回春谷在縣西百里寧化東北四里谷廣二里袤五里  
四時如春 兩鎮三關志嵐谷即寧化回春谷也

寧文堡山在城西背面脊山也半踞山上北踞護城墩  
墩高可三里俯瞰城中

虎城洞在縣北三里

黃花嶺在縣北十三里神池縣界

禪房山在縣東北二十里東連雁門山遶高十里盤踞



二十里洞中有石佛

山產  
氣砂

溫嶺在縣東北神池縣界有大小兩溫嶺

林溪山在蘆芽山後五寨界汾河源此

萬華山管涔右劈支靜樂縣界

支鍋石山管涔山之支高二里盤踞五里下有支鍋石  
相傳昌寧公遺蹟石罅多水脉

黃嵬山聯崞縣界 宋遣沈括報遼聘爭辨數四乃舍

黃嵬山

虎北山接神池縣界

豪蓮臺即托邏臺也宋王侁望楊業兵地

紫峯山 橫山 樓子山

蓮花山 段家山 刁胡山 石嶺 麻糝嶺 牛家

嶺 六番嶺

王野梁 宋村嶺 壩塢嶺 湖嶺

汾水源出管涔山天池下又一源出林溪山龍眼泉合

於寧化所南四十里定河

少昊孫昌寧公所定

南流入靜樂縣

界水經汾水出太原汾陽縣北管涔山十三州志出武州之燕京山水經注燕京山管涔之異名也其山重阜修巖有草無木泉源道於南麓之下蓋稚水濛流耳又西南夾岸連山聯峯接勢又南與東西温谿合水出右近谿聲流翼注水上雜樹交蔭雲垂烟接自是水流潭漲波襄轉泛五朝志靜樂有長城有汾陽宮有關官有管涔山天池汾水關官即樓煩關也括地志汾水源出嵐州靜樂縣北百三

十里管涔山北東南流入并州西南流至絳州蒲州  
入河 顏師古注汾水出汾陽北山 元志汾河源  
自河東朔武州之南亂山中西南流過管州冀寧路  
汾州霍州晉寧路絳州又西流至龍門凡千二百餘  
里始與黃河合 汾河共長一千三百四十里

天池在縣西南三十里管涔山周五里水不測深淺日  
出時澄光四射霞映滿山池東有小池清鑑眉髮與  
天池通南之燕京山胥繇寧化所北中山寺出峽合

流汾河 水經注桑乾泉潛泳太原汾陽縣北燕京  
山之天池其水澄渟鏡淨而不流若安定朝那之湫  
淵也清水流潭皎焉衝照池中嘗無芹草及其風澤  
有淪輒有小鳥翠色投淵銜出若會稽之私鳥也其  
水陽焯不耗陰霖不濫無能測其淵深也古老相傳  
言嘗有人乘車於池側忽遇大風飄之於水有人獲  
其輪於桑乾泉故知二水潛流通注矣池東隔阜又  
有一石池方可五六十步清深鏡潔不異大池 羅

點閣見錄汾陽有天池在燕京山上周迴八里後魏  
孝文帝以金珠穿魚七頭於池放之後於桑乾原得  
穿魚猶為不信又以金縷拖羊箭射著此大魚久之  
又以桑乾河得所射箭山在嵐州靜樂縣東北百四  
十里俗名天池曰祁連池 土人名天池躍鱗池  
西有老馬溝隋開皇間建祠池上祈禱多應 金志  
朔州鄆陽縣有桑乾河太和嶺天池雁門關霸德山  
唐地理志下為雁門山今雁門關在東 齊天保

六年六月甲戌諸軍大會於祁連池 九年六月乙  
丑上自晉陽北巡己巳至祁連池戊寅還晉陽 天  
保末顏之推從至天池以為中書舍人令中書郎段  
孝信將敕書出示之推之推營外飲酒孝信還以狀  
言顯祖乃曰且停繇是遂寢 武平七年十月丙辰  
上大巡於祁連池 唐置天池監 楊光遠在代北  
嘗以紙錢祭天池投之輒沒 遼來求天池廟地河  
東帥龐籍不能決以諉汾州都監郭遠遠訪得太平

興國中故牘證為王土檄報之遼人愧伏 元好問  
詩天池一雨洗氛埃全晉堂堂四望開不上朝元峯  
北頂真成不到此山來 韓琦知并州遼占天池廟  
地琦召其酋豪以曩所求修廟檄正之

元池在縣南二十里山巔天池山麓元池號雌雄海唐  
置元池監 貞元十五年置樓煩天池元池牧監各  
一設使領牧馬下有鐵

磁窰灣河在寧化西南五十里榆會堡東流至十家莊



入汾河

灰河源出縣西四十里分水嶺南流經關東出陽方口入朔州境一名渾河

王瀾灘河出靜樂縣西流至縣溝口村入汾河

蘆芽山河出蘆芽山東流至壩門口入汾河

支鍋石水出支鍋石合流汾河

龍眼泉在林溪山下五寨界乃汾河之一源也

清真泉在蘆芽山半瀑流經清真菴故名

紫龍池 周武池

古泉

偏關縣

九龍山在縣城周環九峯

韓光嶺在縣東一里北漢建偏頭砦遼置武寧縣址胥  
存工有玉清真境

雙鳳山在縣東七里兩山對峙形似雙鳳下有二泉名

鳳眼

按兩鎮三關志有三鳳山即雙鳳也

虎頭山在縣東四十里山形盤踞

劉家山在縣東四十里下有石洞

張家山在縣東四十里峻峯巉巖

草廠在縣東六十里仰峻嶺俯陡澗

吳泉嶺在縣東七十里高百餘仞西連草廠炎暑涼風  
下有清泉通南溝

馬鞍山在縣東七十里以形似名 明嘉靖四十三年

俺荅繇馬鞍上入老營游擊梁平守備祁謨禦之伏

金史地理志卷二十二  
發七百餘人胥沒

鵬窩山在縣東七十五里

西山在縣東七十五里石壁嵯峨

馬家山在縣東八十里有朝陽洞內有陰陽二穴陰穴  
淺陽穴甚深近穴似聞風雨聲

鎮溝樓在縣東八十里亦險隘也故山名為樓

鴉兒巖在縣東八十五里層巒疊石下臨清泉

雙碑塢在縣東九十里乃老營界也馬鞍山之役巡撫

萬恭勤雙碑紀七百人名故名

馬頭山在縣東九十里在老營堡西北高三里盤踞七

里以形似名

地椒峯在縣東九十五里

產地椒

土寨在縣東九十五里孤峯獨秀

大蟲嶺在縣東百里奇峯峭立巖壑幽邃昔多茂林後

寢童矣

南堡山在縣東百里土山戴石周數十里上有五色石

好漢山在縣東百里老營堡東高百餘仞盤踞四里山  
形幽麗雲氣碧籠

柏楊嶺在縣東百里昔多柏楊樹故名高五里盤踞九  
里

鄧家山在縣東一百十里土山戴石

南北長嶺在縣東百三十里周四十里

鐵駝瑪沙在縣東南十五里沙中藏鐵似虎

蒲座山在縣東南二十五里山勢殊雄

霸子山在縣東南三十里峨峯壘壁夏人屯兵於可  
敦館金都統宗翰遣婁室戍朔州築城於霸德山西  
南二十里遂破朔州西山兵二萬擒其帥趙公直

蒿溝廟山在縣東南四十里上有廟廟有碑記

溪洞在縣南三十五里迤西村洞中怪石錯峙形似林  
屋石色似水晶入二里聞水聲不復能前矣

龍霸山在縣南四十里高七里盤踞十五里昔嘗起蟄  
昭君瑪在縣西北二十里相傳明妃經此一足跡留石

磐上

紫荆山在縣西北二十里昔多紫荊花故名

萬家寨在縣西北四十五里巨石巉崖下臨河岸

北峯巖在縣西北五十里高百仞臨黃河岸上有石洞  
數十相傳僧北峯棲此

北石梯嶺在縣北十里高三里磴道盤旋山脉聯滑石  
澗老牛灣二堡

十八盤山在縣北四十里高百餘丈石蹬巉削雲氣時



繞

明燈臺山在縣北五十里高百餘丈崖峽中啣鐵盞相傳昔放鐙光焉

東長嘴在縣北五十里東西石嘴胥袤五六里河經其中東石岸西石岸乃中外分界地也

常勝山在縣北六十里右連老牛灣左接滑石澗匪直雄視塞外諸山抑亦俯瞰黃河矣故以常勝名

蠶虎口在縣北七十里滑石澗堡前昔稱邊隘今農民

耕塞外田馬

白龍殿山在縣東北五里山環峯繞下有石洞巔水滴  
沿禱雨輒應名石沿洞山脉迤東北七十餘里聯水  
泉邊隘

草塚山在縣東北六十里上有堡

驢皮窰口在縣東北六十五里地勢平行昔為邊衝

瞭高山在縣東北七十里孤峯峻秀

駱駝山在縣東北七十里山形似駝相傳李文忠北征

憩兵於此下有駝洞深不可測土人秉炬入里許蝶  
大似箕翔舞逼人乃返

猴兒山在縣東北百里以形似名

視遠洞在縣東北一百十里乃五眼井堡邊隘也戍樓  
遠眺下有石洞

了角山在縣東北 偏頭山為北派接大同之了角而  
西為草塚明燈臺紫荆山以至老牛灣而西盡於河  
王家屏修守三邊記偏關起葦菜峒迄了角山

糊獮山

黃河在縣北老牛灣口界緣邊曲朔西關河口距縣城  
二十里 鄭曉書三關圖雁門三關之山東起代郡  
外斷雲中內畧太原北境西盡雍河之濱

焦家坪渡

娘娘灘渡

太子灘

羊圈子渡

唐家會渡口在關西七十里陝西往來渡此濱河州

縣歲鑿冰以防套萬恭為築牆四十里

海子溝在縣東二十里湧泉

寺兒溝在縣東四十五里接大泉溝盈涸不恒

吳泉在縣東七十里出吳泉嶺

南溝在縣東七十里上有崇嶺下有清泉

鶯窩溝在縣東百里陡澗削巖林樾中有鶯窠

弔子溝在縣東百二十里溝接垣外曲通關河

新窰溝在縣東百三十里溝接垣外

馬園嘴溝在縣南三十里源出龍眼泉繇樊家塢溝岔樓會火頭溝水北入關河

迤溪溝在縣南三十五里東西袤二百里下有溪洞水滴成乳

暖泉在縣西二里五嶽廟巖下泉濱草冬榮巖壁鑄甘露泉三字

滑石澗在縣北六十里有堡

大泉溝在縣北七十里地有湧泉會紅水溝折入關河  
關河在縣北一百十里源出朔州界流經偏頭關西北  
入黃河 關河即官河也東南接朔州界距邑百四  
十里東接平魯縣界距邑百二十里北達垣外距邑  
百餘里源出老營堡狐狸溝鴉兒巖沙窰寺諸泉西  
流經城南折而繞城西北直溯關河口入黃河後多  
淤塞惟沙窰寺諸泉湧流由泉源距城二十五里馮  
沙廟溝在縣東北六十里袤五十里起草塚山流入關

河

水門溝口在縣東北七十里滑石澗東上有敵樓下有湧泉差號險隘

黑河 麥河 馬水河

鳳眼泉 九峪泉 平泉 黃龍池

以上三河四泉見大同紀

神池縣

蘆芽山在縣西南六十里五寨縣界有石洞禱雨輒應郝家坡在縣南八里



黃花嶺在縣南十三里主峯高四十丈遶高五里盤踞二十里南東胥連寧武界一名摩天嶺嶺上有始皇舊長城岢嵐州有古城墩趙之李牧守雁門則上谷雲中或開拓在後抑依險以為城如今之內邊耶

石炭窰山在縣西南十五里

產石炭

旗山在縣西南三十里盤踞二十里高三十五丈西連五寨縣山東連黃花嶺參差旋曲其形似旗土人名霸王嶺

虎北山在縣西南四十里高三十八丈盤踞二十里西  
連五寨縣山南連寧武縣山

洪佛山在縣西南六十里蘆芽之支也上有石廟廣二  
尺禱雨有神蛾賜水於瓶內火燎炙取下山輒雨

姜女石在縣西三里海子梁方石一廣盈畝中有石窟  
旁有女子足跡相傳孟姜女夏日坐哭於此窟有泉  
名姜女井

鐵爐山在縣西五里相傳尉遲敬德造鎧甲於此

五連山在縣西十里高十六丈盤踞十里繇縣城迤西  
屢起屢伏

鳳凰山在縣西二十五里高二十三丈盤踞五里連橫  
山山兩翼似鳳大雪日霽輒有紅黃小鳥飛鳴似歌  
舞

橫山在縣西三十里高二十丈盤踞七里  
馬蹄山在縣西六十里接五寨縣界

輓轡窰在縣西七十里山巖高三十丈中有洞洞口懸

輓轡陟山者繫輓轡而上洞廣一畝能容萬人與五臺清涼石同著靈跡云

磨石山在縣西北八十里高三十四丈盤踞十五里山境清幽

喜雀山在縣北二十五里盤踞十五里高二十八丈東南連馬邑縣界

大溫嶺在縣東北五里溫嶺村

小溫嶺在縣東北

神池在西門外環城西南冬夏不涸一名西海 劉養  
志文昌祠記寧武北距黃花嶺二十里皆崇岡疊嶂  
鳥道虬盤踰嶺而下自巔抵麓十五里地少平有水  
一泓出無源去無跡旱不涸雨不盈魚藻胥不生名  
曰神池有古城遺址

溫嶺泉在縣東五里流入神池

溝兒澗在縣東五里溝甚寒鳥不敢棲南為寧武界

東泉在縣東南二里流入神池天將雨輒浮五色霞光

南泉在縣南一里流入神池相傳有胡僧坐三日曰歲  
旱可求雨於此此泉源也手爪地而泉湧

義井河在縣西四十里

國朝康熙三十六年二月二十四日

聖祖仁皇帝西征駐蹕河水驟溢以飲牛馬橐駝翼日涸

名興隆河

青羊渠水在縣東北三十里諸谷水匯此

五寨縣

蘆芽山在縣南六十里汾水之西盤踞六十餘里高二  
十里明一統志書二千丈有奇實逾三千丈也西連  
奇嵐東近寧武南接靜樂北倚五寨為全晉崇山第  
一峯巒聳秀形似僧毘羅冠下有汾水源前有羣山  
森列尖似荻芽名小蘆芽上有金龍池五龍洞秀峯  
嶺紫峯巖鳳凰嶺東火場西火場大天澗小天澗東  
身匣九枕梯捨身巖華嚴寺金佛堂太子殿胥稱名  
勝焉 五臺三千九百丈其名也蘆芽三千丈其實

也舊志稱琳宮鐵塢閣黎千衆招提萬間亦足抗衡

古清涼矣

蘆芽管涔實為一山今汾水源隸寧化不詳載

明李穡靜樂志蘆

芽一山崔魏特拔高出雲霄磅礴盤踞可數百里而  
遙寧武朔州處北麓忻州崞縣處東麓奇嵐五寨處  
西麓嵐縣靜樂處南麓而山之左與盤道梁諸山襟  
帶相聯是穡所究竟堪輿嘗跋涉而根極之者也

山前荷葉坪山山後有林溪山右有神林山最上一  
峯突入雲漢五月飛霜千載凝冰或山上霽而山下



雨變幻萬態產香草名蘆芽異香珍卉喬木竒泉怪  
石圖志不克殫述嶺有涵蓮池一名大浴山水經  
注中陵川水出中陵縣東南山下北俗謂之大浴山  
其水亦取名焉一名太牢古山遼清寧中宋求天  
池之地詔左皮室詳袞蕭頁嚕兼統兩皮室軍屯太  
牢古山以備之宋潘閔詩此地絕炎蒸猶疑到不  
能夜深如有雨寺靜若無僧枕潤連雲石牕明照佛  
燈平生多賤骨寒逼恐難勝今山北有逍遙臺逍遙

乃閻自號也 孔天孚贈月空上人序月空上人住持蘆芽山之乾元寺遵其師竒山之業而光大之遂創建二菴在本山曰西照在老營曰園對云又念此山是古佛道場歷劫奉法代有其人獨山居岑寂遠臨邊徼教典稀存講誦多闕乃印造大藏經二部一留本山一貯老營之菴

看花臺在蘆芽山上多異卉歲蕤播颺駭綠搦紅

北峯臺在蘆芽山

看花北峯北嶽名蘆芽三臺殆勝清涼之五臺也

北嶽臺在蘆芽山四周曠灝穴起石丘秀矗雲表上有  
北嶽廟

石拱在蘆芽山上構危樓

鳳凰嶺在蘆芽山形似鳳

秀峯在蘆芽山山形殊秀

五龍洞在蘆芽山深窈

萬佛石洞在蘆芽山 明釋福登神宗賜號真來佛子  
造萬佛鐵塔鑿萬佛石洞神工具備

紫碧山即蘆芽之紫峯巖也

管涔山在縣東南八十里寧武縣界

東雪山在縣東南十五里蘆芽支峯也高八里盤踞七里山下雙泉湧出殊黃黑有馬家寺古塔

殿坪山在縣東南神武川水經其下

神武鎮口山在縣東南有河繇口出古為神武川地  
南山在縣南五里蘆芽支山也有清蓮河上有長城梁  
峯臺梁環抱斷續形似水波曲漾東抵寧武雁門二

關為縣南屏東越縣境為神池之虎北山旗山又東  
為黃花嶺諸山

長城山在縣南三十里

西雪山在縣西南二十五里高十里盤踞十里西南連  
荷葉坪山山勢崇峻暑月沒寒舊有蘆芽香火院

荷葉坪山在縣西南六十里北麓在縣南二十里高千  
丈有奇盤踞八十里有奇西連奇嵐諸山南連寧化  
諸山東連蘆芽山北連西雪山山巔平廣圓秀形似

荷葉又產旱蓮花草故名汪可受詩荷葉坪前客

蓮花峯下人奇嵐志雷山在荷葉坪勢極峻險

韓信洞在縣西四十里

峯臺梁在縣北六里

深塢山在縣北七十里偏關縣界

馬蹄山在縣東北三十五里峻峯突起巔胥蒼石上有

馬蹄疊對相傳尉遲敬德遺跡

瀾蓮池在蘆芽山上一名金蓮池水深丈餘廣十丈米

色似金流光焜耀朝鬱祥雲夕輝皓月遊人或以金珠投水中宛在眼底手摸之不可獲所謂瀰蓮異水也

甘露泉在縣東南十五里馬家寺相傳尉遲敬德馬跑出泉因名馬跑泉禱雨輒應

清漣河在縣東南六十里發源蘆芽山下西北流經縣城南又北流經三岔堡南又西流入保德州境匯於黃河清泉湧瀉五色水磴蔬圃胥資灌溉河側石

畔有佛足肉紋胥見相傳佛沐浴於此

神武川發源城東南出神武鎮口山乃汾河之一源也  
經殿坪山流至城東繇三岔莊沙泉入於河

麻子澗溝在縣西十五里

祁連池在秀容界有池三所在高山上清深不測相傳  
曰祁連池魏言天池也秀容第一領人酋長爾朱新  
興曾與子榮游池上忽聞簫鼓音謂榮曰古老相傳  
聞此音皆至公輔吾年老暮當汝耳天池隸寧武而



北魏書言池三所則首瀾蓮次燕京二池矣

名源水出蘆芽山明志在奇嵐州北五十里東南流入

黃河

大天澗在蘆芽山中

小天澗在蘆芽山中競爽大澗

北溝灘在蘆芽山麓

山西通志卷二十二

欽定四庫全書

史部

山西通志卷二十三  
四三

詳校官監察御史<sub>臣</sub>查善長

檢討<sub>臣</sub>德生覆勘

總校官進士<sub>臣</sub>朱鈐

校對官編修<sub>臣</sub>勵守謙

謄錄監生<sub>臣</sub>杜文海

欽定四庫全書

山西通志卷二十三

山川

七

澤州府

鳳臺縣

太行山在縣南三十里天井闕橫望嶺諸峰雄峙為山  
總會西南接砥柱析城王屋又西迤姑射中條雷首  
東北跨陵川壺關潞城黎城遼州和順武鄉諸州縣

又東為燕山至碣石綿亘數千里隨地異名北嶽霍  
山五臺句注蘆芽皆其支脉海內名山繇崑崙而下  
當以此山為第一云 禹貢太行恒山至於碣石入  
於海 正義地理志云太行山在河內山陽縣西北  
恒山在上曲陽縣西北太行去恒山太遠恒山去碣  
石又遠故云此二山連延東北接碣石而入滄海也  
顏師古 山海經北次三經之首曰太行山 河圖括  
註同 地象太行天下之脊括地志太行山連亘河北諸州

凡數千里為天下之脊

林少穎曰為河北脊以接恒岳文翔鳳雲夢樂溪談太行

為脊黃河為腸中水

郭緣生述征記太行首始於河內自河內

北至幽州凡有八陁第一軹關陁第二太行陁第三

白陁

此三陁今在河內

第四湓口陁

在鄴西

第五井陘第六飛

狐陁

一名望都關

第七蒲陰陁

此三陁在中山

第八軍都陁

在幽州

爾雅山中絕曰陁元和志連山中斷曰陁 程子曰

太行千里片石衆山皆石上起爾 朱子語錄太行

山一千里河北諸州皆旋其趾潞州上黨在山脊最

高處過河便見太行在半天如黑雲然又曰太行山極高晉州蒲坂山之盡頭又曰太行自崑崙北支入中國西南行歷并冀三晉抵河東復與河會 王伯厚地理通釋秦漢之間稱山北山南山東山西者皆指太行以其在天下之中故指此山以表地勢 唐樞太行山記山自北紀雲中發宗行平定州至上黨遼沁潞澤行亘多起彰衛懷三府南受藩垣中原自是西奔為中條至雷首東發為燕山至碣石左右行

皆其托祖故曰太行又以介省故名省曰山之東山之  
西太行中原之正脈兩腋如華蓋所以冒中原而重其  
力惟其起張兩脈故身不自結而凝為所冒之中以其行  
局之宏非太行不足以當之而其伊止之所乃所以為行之  
地蓋言意也 五朝志丹川有太行山隋志同 括地志太行山在  
河內縣北二十五里南屬懷州北屬澤州 元和志太行山在  
晉城縣南四十里 山海經太行之山其首曰歸山其上有金玉  
其下有壁有獸焉其狀如麇羊而四角馬尾而有踞其



名曰駢善還其鳴自詁有鳥焉其狀如鵲白身赤尾  
六足其名曰鷦是善警其鳴自詁 列子太形王屋  
二山方七百里高萬仞淮南子武王克殷欲築宮於  
五行之山周公曰夫五行之山固塞險阻之地也丹  
鉛錄太行山一名五行山高誘曰五行之山今太行  
山也在河內野王縣西北上黨關也 崔伯易感山  
賦坳然若鞍者曰鞍山突然若竈者曰竈山色黑  
者曰黑山形方者曰方山 墨翟察而知驥之貴尸

倭過而辨牛之難穆王升由雀道而出世宗行自大  
河而還孝明嘗登幸上黨郡章帝以游至天井關孟  
德北上紀摧輪之恐謝公西顧引憂生之端阮籍失  
路而詠懷劉峻懷交而發嘆歸晉陽子惠之便道對  
二坂祖濬之祥觀開元錫問於逢車武德置縣而當  
煩霍褰吾襟共附吾肘纏午壁之勢探長城之口天  
門揭其部分烏嶺支其躡蹂姑射王屋隆慮雷首靡  
迤欽岑參錯釘餽或拱其左或捧其右或導其前或

贊其後讓以竒巘貢以重岫 六帖昔王烈嘗入太行山聞雷聲往視之見山石上破數百丈石中有一孔尺餘中有青泥流出烈取搏之隨手堅凝氣味如粳米飯仙經所謂石髓也服之壽與天齊 蘇軾志林王烈入山得石髓懷之以餉叔夜叔夜視之則堅為石矣當時若杵碎或錯磨食之豈不賢于雲母鐘乳輩哉然神仙要有定分不可力求退之有言我能詰曲自世間安能從汝巢神山如退之性氣雖出世

間人亦不能容叔夜婞直又甚于退之也 上有孔

子回車轍 王世貞適晉紀行初九日黎明冒雨發道有古祠刻石崖表曰孔子回車處按趙殺鳴犢孔子臨河而返此去河遠蓋傳會語也 陳棐回車廟

解經太行天井關關有孔子廟號曰回車石上轍跡深尺長數十武客曰天井關俗亦名攔車父老傳為孔子見黃鼠拱立或曰小兒拱揖因之回車豈必盡誣陳子曰古地志高都縣有天井關蔡邕曰太行山

上有天井關關在井北遂因名焉故劉歆遂初賦曰  
馳太行之峻坂入天井之喬關史漢光武建元二年  
遣司空王梁北守天井關擊赤眉別校是關亦兩漢  
三國前所設至于攔車之名果俗因回車之妄附會  
之而狼車則又攔車流訛也漢永平十三年登太  
行幸上黨隋大業三年鑿太行山達於并州以通  
馳道唐元和二年北登太行山至天井關

石人山在縣東南八十八里太行絕頂有石似人有龍

潭 水經注丹水又逕二石人北而各在一山角倚

相望南為河內北曰上黨二郡以之分境 郝經太

行望詩西北兩峰寒云是雙石人

按澤州山晉太行山錄數山以概其

餘

月院山在縣南六十里太行絕頂下臨天柱峰有潭深

不可測中挺峭峰鑿詩云溪潭直上孤峰底怪栢蒼

蒼老不死藜杖長拖嘯一聲虎豹潛形盡縮耳須臾

有客話無生旋煮新茶汲水水樵歌依約耳邊來詩

情只在烟嵐裏仙人李題

黑石嶺在縣南八十里太行絕頂登其上中原胥在目  
矣

橫望嶺在縣南六十里 唐書狄仁傑自汴州參軍移  
并州法曹親在河陽仁傑登太行山反顧見白雲孤  
飛謂左右曰吾親舍其下瞻悵者久之雲移乃得去  
王世貞適晉紀行午飯萬善驛自是始入太行亦  
不甚險惡昇夫魚貫而上久之以為絕頂矣乃復有

山障之愈上愈不窮至碗子城為豫并界兩山相對  
數十百丈巨壑陡絕無底中為嶺道石梁如玉雪又  
復數嶺回顧中原愴恍無盡平楚鬱鬱紛吐蒼翠  
日色與雲氣爭長俄而雨繚數十里中亘其半狂風  
驟發萬竅怒號食頃雨亦隨至誦唐人三晉河山皆  
北向二陵風雨自東來語儼然若畫

洪谷元好問寶嚴紀行詩太行有洪谷勝絕無出右大  
似塵外人眉宇見高秀哀湍下絕壑電激龍怒鬪崩



奔翻雪窖瑩滑瀉瓊甃

洞子巖在縣東十五里下臨聖字泓一名琵琶泓有黑

虎洞

磨齒山在縣東二十五里有媧皇廟連珏山浮山丹水流其下

龍門峽在縣東三十五里兩山夾流即丹水也傳為禹鑿

天池嶺在縣東三十七里巔石壁立如城南北二石門

中容千人古嘗建寨

玲瓏山在縣東七十里一名崆峒山有風穴

松林山在縣東九十里連晉普山白龍觀音二洞腹背分踞

浮山在縣東南三十五里連珏山磨齒山丹水流其下高似雲浮北谷有媧皇窟中虛如囊相傳鍊石補天地崔伯易感山賦序太行一名皇母一名女媧庸或於此鍊石即今山連磨齒女媧祠

硤石山在縣東南二十五里雙石壁立如門丹水湍奔  
西有擲筆臺上有青蓮山寺下有巖崖袤丈餘廣倍  
之夏秋暴雨中罅似雷鳴相傳慧遠注涅槃經成擲  
其筆曰若疏義契理筆當駐空已而果然 僧傳北  
遠法師作涅槃經疏畢擲札於庭柳枝生焉

珏山在硤石山南一名角山上有欵月臺連浮山磨齒  
山丹水流其下

蟠龍山二一在縣東南九十里一在縣西北六十里

龍潭峽在縣東南九十里 水經注丹水東南歷西巖  
下巖下有泉湧發洪源巨輪淵深不測蘋藻冬芹  
竟川含綠雖嚴辰肅月燕麥暄萋 五股泉匯流陡  
下為潭乃慧遠說法地也

紫金山在縣東南九十里太行之支有黃龍洞東五十  
五里有蓮花洞

十八盤 潦波 鐵櫬山脊在縣東南

九里谷在縣南九里 元李俊民詩連峰忽斷開山門

碾子谷在縣南二十里 宋石守信破李筠於此

香爐山二一在縣南三十里懸崖斷澗中峰突起太行  
之支也一在大陽鎮西山上有虎跑泉

羊腸坂在縣南三十里盤曲如羊腸

天井谷在縣南四十五里

磨盤寨在縣南六十里

天柱山在縣南六十里

寶山在縣西南五里即碧落之支下為冶家河

吳神山在縣西南六里即晉普之支上祀泰伯仲雍

玉仙山在縣西南三十里有白石先生洞

晉普山在縣西南三十五里積雪不消乃松林高峰也

山有九泉上有李衛公廟

松嶺山在縣西南九十里晉普山之次 楊廷秀詩澤

居太行巔繞郭山如帶西南古松嶺傑出羣峰外

萬松山劉龍靈巖寺藏經塔記澤西南有山曰萬松中  
有寺為靈巖其山蜿蜒綿亘雙峰矗聳若鸞鳳騰

蒼松檜森蔚行竟日不見天日以是得名為太行一  
支勝概寺亦茲山佳境也

佛頭山在縣西南對峙晉普山

追山在縣西南

金剛嶺在縣西二里

五門山在縣西十二里連碧落山形似城墉有五門

桃固嶺在縣西二十里一名寨子嶺

可寒山二一在縣西三十五里連岳神山有乾明寺一

在縣東北三十里有龍王廟

岳神山在縣西四十里連陽城史山沁山榼山沁河流  
其下上有天仙洞以樂氏二女名

方山在縣西四十里壁立如砥可寒之支也

洞陽山在縣西四十二里上有天仙廟

黃沙山在縣西四十五里晉普之支也有神仙掌

碧落山在縣西北十五里連司馬山沙河流其下一名

卧雲山



伊侯山在縣西北二十里沙河水源此 相傳伊尹從

湯禱雨經此有伊尹廟

聖王山在縣西北四十里連司馬山有湯廟有顯化池  
石佛谷在縣西北四十五里碧落山下皇甫湜詩曰漫  
澶太行北千里一塊石平腹有壑谷深廣數百尺又  
曰金仙琢靈象相好倚北壁花座五雲扶玉毫六虛  
射

梧山在縣西北六十里相傳梧丘子隱此

蟠龍山在縣西北六十里

香山在縣西北

吾山在縣西北

司馬山在縣北十里連聖王山上有晉司馬懿碑風土

記司馬山在晉城晉代祠此因以為名蓋司馬就司

馬望胥守郡也一名小析山有嘉潤池泉之支源也

宿鳳臺在縣北四十里李村相傳晉太始元年鳳鳥集

於高都之北

莒山在縣東北五十里有道泉溪即浮山之支有蘭相如廟

金玉嶺在縣東北四十五里莒山左相傳蘭相如持璧歸趙經此

步佛山宋紹興十年太行義士王忠植詣慶陽城下大呼曰我河東步佛山忠義人也

丹谷魏建義三年九月丙辰詔大都督行臺源子恭率步騎一萬出西道行臺楊昱募勇士八千徃東路子

恭仍鎮太行丹谷 壬申爾朱世隆停建興之高都  
爾朱兆自晉陽來會之十二月壬寅朔兆寇丹谷都  
督崔伯鳳戰歿都督羊文義史忤龍開柵降兆子恭  
奔退

丹水在城東北三十里舊號泣水源出高平縣西北仙  
公山南流入縣境經城東一里又出丹口南流三十  
里入沁河 水經注丹水又東南流注於丹谷即劉  
越石扶風歌所謂丹水者也 晉書地道記曰縣有

太行關丹溪為關之東谷途自此去不復繇丹水又  
逕二石入北又東南歷西巖又南白水注之又東南  
出山流注於沁謂之丹口 劉餗隋唐嘉話澤州北  
有丹水其源出長平山下傳云秦殺趙卒其水變赤  
因以為名今上始幸太原知其故改為懷水

雙泉在縣東三十里白湍奔流

乾河在縣東南八里白水至此伏流唐李德裕請令陳  
許兵過乾河立寨即此 昭義腹心將高文端降言

澤州兵大約萬五千人賊常分兵大半潛伏山谷伺  
官軍攻城疲弊則四集救之今請令陳許軍過乾河  
立寨自寨城連延築為夾城環繞澤州李德裕奏請  
詔示王宰

溫泉二一在縣東南十里一在縣東三十里郭壁山中  
五龍溪在縣東南三十里上建五龍宮

馬跑泉在縣東南三十里傳為魏道武帝蹟

瀑水簾在縣東南三十里郭壁村一名水簾洞石崖高

蟲洞口有泉瀉崖而下 李俊民詩倒傾峻室瀉瓊  
瑰派落空巖雪浪堆

白水在縣南一里源出五龍池東入丹水 水經注丹  
水又南白水注之水出高都縣故城西所謂長平白  
水也東南流歷天井關晉太元十五年征虜將軍朱  
序破慕容永於太行遣軍至白水去長子百六十里  
白水又東天井溪水會焉白水又東南流入丹水謂  
之白水交 金志晉城有太行山丹水白水天井關

通考明一統志白水在城南三里源出湖泓水東南

同  
流合丹水

天井溪在縣南四十五里注白水一名聖井關源出天井關北流注白水土人名北流泉

小山泉水在縣西南三里一拳堵立泉出巖罅淙淙流響

洞靈泉在縣西南五里一名流盃泉

沙河發源伊侯山一流至東關一流至西關合入白水



錦溪在縣西七里夾岸屈曲

嘉潤池在縣北十里源出司馬山禱者誠則香楮沉不  
則浮

黑龍潭在縣東北十里司馬山下禱雨以石投之

源漳水在縣東北三十里源出可寒山東入丹水 漢

地理志高都莞谷丹水所出東南入泫水是也源漳

水即源澤水 舊唐志唐武德元年移丹川於源澤

水北

琵琶泓楊謨詩晉城出郭十里餘百丈懸崖掛層屋耳  
曠不聞琵琶聲但見一泓春水綠

淵靈泉在米山西谷有祠禱雨多應宋賜號淵靈

高平縣

七佛山在縣東五里高出羣山有淵靈泉左右環河上  
建七佛寺

米山在縣東十里趙將廉頗積米於此土人名大糧山  
一說春秋米子國赤狄後有定林寺內定林泉西谷

乃淵靈泉也

金志有頭驢山米山丹水劉龍米山

鎮修垣牆記高平縣之東南十里許有鎮曰米山居

民稠密猶一邑然當澤潞之衝商賈輳聚百貨咸集

營房嶺在縣東十里廉頗屯軍於此背峰面澤有險可

憑

野蚡嶺在縣東十里旱蝗祭於此

龍從山在縣東二十里山形崆嶷土人傳可望黃河

風洞在縣東南十里山坡出恒三日入恒三日

游仙山在縣南十里前有游仙寺金李游仙讀書於此  
嘗啟地得古鐘聲徹山下數十里後年百歲終里人  
名里為游仙坊山亦名游仙山

頭臚山在縣西南五里上建頭臚廟

懸壺山在縣西南二十里形似懸壺上有懸壺真人祠  
卧佛山在縣西南三十里馬村鎮

玉泉谷在縣西南三十里石壁嶙峋下有清泉  
吾山在縣西南四十五里接澤州境山有三峰

空倉山在縣西南四十五里秦白起詭運米置倉於此  
以給趙括

金峰山在西郭外上有金峰靈巖寺

五龍山在縣西二十里上有五龍池禱雨多應傳為慕  
容永時五色雲見地

浩山在縣西四十里有石朶山峰似花朶山西為老馬  
嶺沁水界

董峰山在縣西四十里上有馬仙姑石柳

空箱山在縣西四十里形似箱

走馬嶺在縣西北十五里有鐵鑛

省寬谷在縣西北二十里唐志有省寬谷本名殺谷玄  
宗幸潞州過之因更名

鳳頭山在縣西北四十五里發鳩山巔縣城遙望殆似  
補縣缺然

金門山在縣北五里土赤色耀日似金山當趙壘之門  
韓王山在縣北十五里山形特起上平地數畝俯瞰羣

山如培塿然相傳秦園韓王於此有玉女泉

釜山在縣北三十里形似覆釜一名朗公山朗公倉頡也上建倉頡廟

黑龍洞在朗公山下深數百步中有清泉

石室山在縣北三十里昕見五色雲晡散畢振姬嘗憩此

傘蓋山在縣北三十里長子界

仙公山在縣北三十里相傳張果老過此

牛心山在縣北三十里產石甚潤可硯

羊頭山在縣北四十里長子界有黍二畔其南陰地黍  
白其北陽地黍紅因之以定黃鐘陰地黍白乃高平  
界也

丹朱嶺在縣北四十五里長子界

發鳩山在縣北五十里丹水 sources 此夕常聞風雨聲明月  
不輟

蓮花山在縣東北十里迴峰曲嶂中有蓮花石



穀遠山在縣東北二十里羊頭山之次產紅嘴鴉

舍利山在縣東北二十五里上有五音洞下有舍利泉  
唐釋大愚公隱此調演五音於洞中常聞五音不絕  
後撰韻母三十上昭宗賜田及紫衣蓋洞中所調演也  
翠屏山在縣東北二十五里層峰秀石

龍王山在縣東北三十五里上有石佛洞三教洞子孫  
洞石渠

丹河源出發鳩山舊名泣水經縣境自西北而東南入

鳳臺縣境合白水穿太行山瀉於沁 上黨諸山之  
水建瓴而下暴雨輒漲二三丈涌赤土似丹色然

祝志云方輿勝覽謂白起坑趙卒於此血流成川斯  
盖好奇之說恐未可據 水經注沁水又東與丹水

合水出上黨高都縣故城東北阜下俗謂之源源水  
山海經曰沁水之東有林焉名曰丹林丹水出焉即

斯水矣 出高都東北  
當即今長河 丹水自源東北流又屈而東注

左會絕水地理志曰高都縣有莞谷丹水所出東南

入絕水是也絕水出涇氏縣西北楊谷里地理志曰  
楊谷絕水所出東南流左會長平水水出長平縣西  
北小山東南流逕其縣故城涇氏之長平亭也白起  
坑趙卒於此漢武帝元朔二年以封將軍衛青為  
侯國其水東南流注絕水絕水當即今浮雲河  
長平水當即今許河絕水  
又東南流逕涇氏縣故城北竹書紀年曰晉烈公元  
年趙獻子城涇氏絕水東南與涇水會水導源縣西  
北玄谷東流逕一故城南俗謂之都鄉城又東南逕

涇氏縣故城南世祖建武六年封萬普為侯國而東

會絕水

此縣志所謂舊名涇水者也

亂流東南入高都縣右入丹

水上黨記曰長平城在郡南山中丹水出長平北山  
南流秦坑趙衆流血丹川由是俗名為丹水斯為不  
經矣 唐志有涇水一曰丹水貞元元年令明濟引  
入城號甘泉 通典高平漢涇氏縣西北有涇谷水  
故為名通考 漢志注涇氏楊谷絕水所出南至埜王  
入沁應劭曰山海經涇水所出者也

天王池在縣治集賢橋西水族不生

舍利泉在開化寺

定林泉在縣東十里米山鎮北有定林寺山穴湧泉似

噴珠灑空可池可軒

淵靈泉在縣東十里米山西谷有祠禱雨多應宋賜號

淵靈

橫澗河在縣南五里

許河在縣南二十里匯縣西南之水經許莊流入丹河

濟瀆池在縣西南六里骷髏村

原潔泉在縣西二十里原村即許河之源也周四丈深  
一丈五尺清而甘冬溫夏涼東西分引溉田西南流

十餘里合山澗經許莊名許河

此豈所謂二軍共食  
流水澗相去五里者

耶

浮雲河在城北宋大中祥符元年龍見於河因名浮雲  
金皇統元年龍復見

金龍泉在縣北二十里團池村相傳二魚時躍於泉遇

雨即飛去今名蓮花池

玉女泉在韓王山有玉女祠土人時禱雨焉

鴉兒溝在丹朱嶺南金明昌間張勝家溝南麓羣鴉驅之不去

長河在縣東北南流入丹水環縈袤渺而七佛山界其中故有東西長河之別

陽城縣

太行山在縣東南連析城王屋諸山 魏散騎常侍陸

旭好老易緯候之學撰五星要訣及兩儀真圖得其指要太和後知符象遂隱於太行山

底柱山在縣東南五十里連析城王屋山 山有三峰中峰最高秀其下皆土唯起峰處為石若石柱然故名西南三十里為析城五十里為王屋 禹貢底柱析城至於王屋 孔傳此三山在冀州之南河之北東行 尚書註陝州三門山有底柱石其形如柱似鑿後得名 正義地理志云析城在河東濩澤縣西



王屋在河東垣縣東北地理志不載底柱底柱在大

陽關東析城之西

按正義指底柱在析城之西是指陽城底柱山也

通考禹

貢底柱析城至於王屋太行皆在州境是全有太行  
之險固 楊鵬翼詩方迎峭壁疑無路纔轉深谿別  
有天

析城山在縣西南七十里太行支山 晁氏曰草木分

析曰析山峰四面如城 巔東巖有龍洞有龍池

龍窠 上有成湯廟二泉亢旱不竭傳為成湯禱雨

地又傳泉通濟瀆 水經注上澗水南歷析城山北  
山在護澤南禹貢所謂砥柱析城至於王屋也山甚  
高峻上平坦下有二泉東濁西清左右不生草木數  
十步外多細竹其水自山陰東入護澤水 顏師古  
註析城山在護澤西南 劉昭註護澤侯國有析城  
山前志曰在縣西南 索隱析城山在河東護澤縣  
西南七十里 通典陽城縣有嶠山護澤水析城  
山禹貢所謂砥柱析城也 通考 古今地名析城山方

七百里高萬仞是連王屋山言也 吳澄曰析城在

王屋山西北七十里山峰四面如城有南門焉 王

屋山志析城之山升白氣於天落五斗峰化為濕雲

自竇中滴水降太乙池 寰宇記山頂有湯王池土

人傳湯旱祈雨處今池四岸生龍鬚草

王屋山在縣南八十里西南跨垣曲縣境 劉會孟曰

在山西澤州唐武德間嘗升陽城縣治為澤州 金

志陽城有王屋山 程百二方輿勝覽山有三重其

狀如屋與陸應陽廣輿記胥謂在陽城縣 山堂肆  
考王屋山在山西澤州陽城縣南上有仙宮洞天廣  
三十里狀如屋故名列子所謂愚公謀徙者即此

盤亭山在縣西南八十里羣峰亭立一名塔樓山

鐵盆嶂在盤亭山左壁立千仞有石泉形若仰盂懸崖  
滴溜白孕謙鐵盆嶂大士殿碑記陽城西南多山其  
秀削攢竦稱最奇者惟盤亭盤亭之尤奇者惟鐵盆  
嶂嶂純石骨一壁萬尋而頂有微膚凝滑若脂方廣

僅數尺當佛座下兼有神瀆出自石隙珠滴成泉下有凹石仰承之涇涘晶徹儼若盆然嶂以此得名

嶢嶢山在縣西三十里下有濩澤縣址 水經注陽衆

水東逕陽陵城南即陽阿縣之故城也漢高帝七年封卞訢為侯國水歷嶢嶢山東下與黑嶺水合 五

朝志濩澤有嶢嶢山 濩澤山 通典嶢嶢山在濩澤

縣 通考嶢嶢山在陽城

清涼龕在縣東二里崖巔有石室有風隧

峪溝山在縣東二十里蒼崖插沁曲磴穿林

小天壇山在縣東二十里形類王屋一峰聳峙俯瞰沁水白孕謙小天壇山神廟碑東二十里曰劉善村當沁水之隈其北一峰最為峭桀羣向諸山頰下之梯級始屆頂以視王屋殆具體而微者耶舊有軒轅廟亦名小天壇或古者用以副王屋也

金裏谷在縣東三十里谷中龍泉建海會寺松柏森蔚樓閣參差曲水迴廊修篁游鯉所謂海會龍湫也張

金銘嘗撰種松銘并獨夜聽泉詩內有鳳尾竹清夜  
無風自響似金玉聲所謂海會竹風也

虎谷在縣東三十五里屯城清溪懸崖 張慎言詩石  
室溪橋泊水東蓋溪盡有小梁梁上懸崖有苗閣似  
飛樓云

可樂山在縣東三十五里層巒曲磴上有瀑布二徑數  
圍高可數十丈山半有龕瀑布挂前似水簾

羊腸坂在縣東六十里下有棲龍池

北隱谷在縣東長河北南有梵洞

南隱谷在縣東長河南

小崦山在縣東南二里峭崖臨沁河上有甘泉

石門在縣東南二里兩山中劃澤水流其中 白孕謙

石門詩萬山奔一城石門當水口仰垂千仞壁清潭

俯承白

香臺山在縣東南二十里上有唐太宗廟

芥山在縣東南四十里相傳蕭王追王芥至此 峰巒



雄亘北巔曰北立門由此而下如入淵井行數十里  
至麓有紅峪水轉而上如陟梯磴又十里至巔曰南  
立門側立一峰曰繫馬椿有試劍山雙巖夾紅峪水  
巔有石人山又有三盤山

九女臺在縣東南四十里屹峙沁河中濤響雷上有  
九天仙女祠 陳廷敬九女臺北黑龍潭詩河流雨  
泫泫此山罄而控其北皆連峰排拶故縱送陡崖臨  
數仞潭水鬱湏洞相傳是海眼仰口若大甕

石塘洞在縣東南四十五里陽阿水入沁之側洞懸山  
坳 白孕謙遊石塘觀龍潭登九女臺紀事石塘至  
臺頂不肯不嶮崎

小寨山在縣東南五十里沁水東繞有鳥道裁可容步  
隱谷在縣東南六十里巖谷嵌空下俯危崖側有梵洞  
龍崖在縣東南六十里崖半有龍洞燃炬行里許有潭  
孤山在縣東南八十里

麻樓山在縣南四十里有東西中三峰相距四五里實

不連屬

蒸餅洞在麻樓山南石壁百餘丈梯繩而上中長二百餘步昔人作板橋三十間今圯後有一泉可飲數百人

峰山在縣南四十五里孤起高峻

黑龍洞在縣南六十里西南深澗中林木環密有黑龍廟

千峰嶺在縣西南四十里析城山東石壁臨清溪仄徑

裁通

修真洞在縣西南五十里臨澗村一名仙人洞洞門屹  
懸躋攀里許有石龍石象石獅石流蘇石爐石榻變  
幻千狀

雲濛山在縣西南八十里府志作九十里峭壁密林  
鐘鼓山在縣西南百里垣曲縣界

卧虎山在縣西四十里山勢殊險麓有靈泉寺谷有  
萬松亭

陶峪在縣西四十里峪左即淘峪河也兩山對峙前突  
高阜土人名石龍戲珠內建福勝寺寺側雙潭澄碧  
其一四周石崖水由崖出似門其一似盆左右蹲石  
似獅

畫山在縣西北三十五里形肖一畫

營匠山在畫山前舊志清淵水自表山而來疑即此  
靈通山在縣西北五十里山半有風洞

萬戶山在縣西北五十里登巔見縣舊治及聚落

傅齊嶺在縣西北七十里沁水縣界

白巖山在縣北三十里中有龍巖刹後圓棚障前鈎栢帶一石梁斜通巖壑上有地平廣六十弓又倚大巖壁立數十仞陟巔可望析城底柱莽樊諸山石梁東南彈碁石下有泉左崦山又左方山胥一山也

楊貞肅繼宗讀書于此

崦山在縣北三十里方山右東有白龍潭禱雨多應又有白龍神洞王國光詩谷轉出清池

方山在縣東北三十里形似憑几

史山在縣東北三十里產鐵西五里有金裏谷堆堆下有鐵鑛

龍巖山楊繼宗嘗讀書於山有詩

金谷在龍泉寺前

隱洞白東谷居此東谷千佛精舍記予歸山中所居隱洞巖壑險絕獨西峰有洞名梵延

白澗嶺在護澤水西下有護澤泉

郎家山

沁河繇沁水縣郭壁鎮南入縣境東北屯城里經潤城東會百眼泉又經沁渡迤邐而南西匯蘆河澤河桑林河又東匯長河至公娥澗出山口建瓴下注至潭懷滙丹水入河 沁河有潤城津 沁渡津 王村

津 水經沁水又南過陽阿縣東又南出山過沁水

縣北

按沁水出山始過沁水縣北宜考

水經注沁水南逕陽阿縣故

城西魏土地記曰建興郡治陽阿縣郡西四十里有



沁水南流沁水又南與護澤水合又東南陽阿水左入焉又南五十餘里上下步徑裁通小竹細筍被於山渚蒙籠拔密竒為醫羽蓋也 沁水南逕石門謂之

沁口

護澤在縣西北十里源出嶠嶢山東南流至平頭莊入於沁瀦水一泓澄瑩不竭縣名護澤州名澤胥以此西白澗嶺下有護澤泉東北流合沁河泉西有護澤靈源祠 通典澤州因護澤水為名 金志有王

屋山護澤 護澤城西三十里澤城村漢置縣唐初  
改澤州治尋移端氏 世紀堯求賢四岳薦舜堯命  
之于順澤之陽即護澤也護澤之漁爭坻舜乃徃漁  
焉鮫人鬻長爭以深潭與之 路史淮南子云釣于  
河濱護澤在今澤之陽城唐護澤縣應劭云澤在縣  
西北沁水東逕護縣故城南漢之澤氏縣魏土地記  
云陽阿有沁與護澤水合者紀在梁惠王十九年晉  
取原武護澤墨子亦言舜漁在此故金鑰謂澤州為

舜澤十道記云澤州以獲澤得名皆在河東或云漁于濟陰雷澤非也

棲龍潭在縣東六十里建龍神祠上有羊腸坂陽阿水自章訓里經境內數十里至棲龍潭兩山夾峙一綫裁通石磴懸陡建瓴瀑注乃入沁河焉水經注沁水又東南陽阿水左入焉水北出陽阿川南流逕建興郡而其水又東南流逕午壁亭東而南入山澗波激石瀨澗八丈環濤鼓轉西南流入於沁水俞

時棲龍潭記盤渦伏流竒成自天 白孕謙棲龍潭  
神廟碑潭當谿谷衆流穿射之衝泓然深窈莫測底  
極或值暑雨秋濤蕩瀟凌嘯及夫沍寒收潦湛然一  
碧若巨螺盛醞醖萬斛沿岸石凝滑如脂履之頭涔  
欲墜習傳其中為神龍之宮潭遂以此名四外山雄  
立矗起稍南平岡迤靡磊然若畫置名曰龜山土人  
廟其陽享祀惟虔 徐乾學午園記午壁亭不見於  
志乘以道元之言考之當在故陽阿縣南為今高平

縣西南界澤州西界與陽城接境其南五十餘里小竹細筍被于山渚蒙龍拔密又南則石門枋口迴轅孔廟接河南野王之地今考其形勢惟棲龍潭尤肖沈水在濟源縣西源本太乙池東北流注於秦澤為濟西源澗水在濟源縣東北南流與西源合為濟東源水經濟水出河東垣縣東王屋山為沈水水經濟注山海經曰澗水出焉西北流注於秦澤郭景純云澗沈聲相近即沈水也潛行地下至共山南復出於

東丘今原城東北有東丘城孔安國曰泉源為沆流  
去為濟春秋說題辭曰濟齊也齊度也員也 漢地

志王屋山沆水所出 釋名濟源也言源出河北濟  
河而南也 洞天福地記濟瀆源出王屋山名沆水  
係清源王所理

玉泉二一在東關青陽坊街北元主簿丞相托克托子圖  
卜岱建清風亭一在西關同固北土人名西大泉  
百眼泉在縣東三十里沁水濱有泉百眼匯流於沁

青蘿河在縣東南九十里源出底柱山緣谿環轉繇王屋山下入濟源 山海經人魚在太行之東北二百里凡記鱖魚鮓魚孩兒魚名鱖名鮓能緣聲如嬰兒土人云聞雷則奔竄山谷

澤河在南郭外源出西三十里析城山之支東合清淵水即西河也自表山而來入於澤水逕城南折而東繇石門下入於沁 水經注沁水又南與護澤水合水出澤城西白澗嶺下東逕護澤墨子曰舜漁護澤

應劭曰澤在縣西北又東逕護澤縣故城南蓋以澤  
氏縣也竹書紀年梁惠成王十九年晉取原武護澤  
者也其水際城東注又東合清淵水又東得陽泉水  
口又東南有上澗水注之水導源西北輔山東逕銅  
干崖南歷析城山北自山陰東入護澤水護澤水又  
東南注於沁水 路史陽城漢護澤縣墨子則言舜  
漁在此澤今在陽城西北十二里寰宇記為烏號切  
矣郡國志言邑西今有地名舜田



桑林河在縣南四十里一名大河源出麻樓諸山歷西  
冶合龍洞川水東北入於沁地多桑名曰桑林相傳  
成湯禱雨於桑林即此今湯廟前瀦水澄泓不竭

盤亭河在縣西南八十里源出析城山麓匯諸澗水繞  
王屋陰迅流而下瀑布垂巖懸河注壑南流入濟源  
界

西河自畫山經縣西南上王曲李丘遶縣西南入於澤  
河水經注澤水又東合清淵水水出其縣北東南

經澤城東又南入於澤水

蘆河古陽泉水也發源沁水縣鹿臺山樓子坡經縣西北芹池劉村蒿谷美泉孔寨至下孔入於沁水經注陽泉水出鹿臺山山上有水淵而不流其水東逕陽陵城南歷嶠嶢山東下與黑嶺水合水出西北黑嶺下即開澄也其水東南流逕北鄉亭下又東南逕陽陵城東南注陽泉水陽泉水又南注護澤水陽泉水古入澤水今直入沁

長河發源鳳臺大陽鎮經縣境入沁河

龍泉明文翔鳳龍泉行險乃在護澤之西芹池之東巖  
壁或懸六七寺澗石頻推兩三松羊腸盤處天如帶  
豕腹脹時水似弓 王國光曰海會亦名龍泉前有  
金谷 王惲憩陽城北龍泉寺詩萬松亭廢久重拂  
短碑看詩注碑大定間澤州刺史楊庭秀撰

靈泉司空圖靈泉禪院記中條發於蒲企於良傑出而  
為太行則天壇不得不冠冕嵩華爭勅日觀也其北

川壑會流盤鬱濃粹自高平西顧以至靈泉極矣泉  
之為靈非惟利物當以滋潤所及不育毒螫也

暖泉王國光詩泉暖猶聞野行香

陵川縣

黃圍山在縣東南五十里孤峰插天陟巔見黃河山半  
洞內有山有谷有風門有雲門有神井有石鷓雙飛  
有石乳塢昔人秉炬深入四五里遇黃河一朽木不  
敢越而返洞口一峰中空如門名天門 孫必振詩

洞口霏霏烟霧輕壯嚴妙相當牕牖座後突兀說法  
臺寶瑤玲瓏三五耦石乳懸空滴蔗漿龍泉清冽嗽  
瓊玖四壁斑斕翡翠屏鳳篆龍章雜蚪蚪石芝倒  
掛白鴿飛石脊蜿蜒蒼螭走

孤圍山在縣東七十里高十里盤踞八里四面山麓至  
此脊為絕壁周圍環合殊肖石城中突涌一峰青插  
天際惟飛鳥可至其上水壑巒映互相噴薄雖畫工  
不能摹也一名孤峰山下有平田水

狀元峰在東川雙峰峭峙殊肖青萍吉祥院碑宋崔有  
孚十五歲鄉貢第一二十五歲狀元及第蘇村墓表  
金武明甫貞元中狀元及第明甫猶子武天佑承安  
五年狀元及第天祐弟天和太和中狀元及第仕林  
莊墓表趙安時字全老號東岡正隆間狀元及第官  
至中順大夫南京路兵馬都總管上騎都尉天水縣  
開國子食邑五百戶賜紫金魚袋安時弟安榮狀元  
及第又晉寧路李俊民狀元及第嘗避兵邑之嵩山

故建七狀元祠於東川

東海神山在縣東十一里

箕子山在縣東二十里遞高五里西南山麓石上巨人足跡相傳箕子避地憩山中及武王訪以治道於此納履焉

花瓶山在縣東五十里遞高五里盤踞七里

板山在縣東五十里連熊耳山山方而峭

馬武山在縣東五十里周百里四壁峭立有漢馬武砦

山中棘無倒刺蛙不鳴土人傳漢光武蹟

風門山在縣東六十里連板山形似門

天柱山在縣東八十里下為輝縣泊

含珠砦山在縣東河南輝縣界

王莽嶺在縣東百二十里輝縣界

菊巘山在縣東南五里高二里一名漳門山捍水口多

菊上建龍王祠

黃園洞在東南五十里黃園山負遠莫測相傳達此系團



翠微洞云洞中石乳滴為浮圖中有靈湫殊清冽  
旱禱輒雨

錦屏山在縣南二十里山形似屏霞彩標映產芍藥宋  
元豐間都君錫棲此邑令呂由庚偕聞人高子美谷  
漢臣入山訪之為芍藥會焉

棲鳳山在縣西南四里東有泉繞山麓伏流

靈泉山在縣西南十里有靈泉

馬鞍山在縣西南四十里臨附城鎮

八仙臺在縣西南六十里石臺突起高數十丈相傳有  
仙棲此丹成乃去

鳳凰山在縣西南七十里形似鳳接高都河至鳳臺縣  
五十里

古賢山在縣西南七十里

志美  
名也

龍門山在縣西一里兩山橫亘中缺似門

魯山在縣西十五里上有松峰

秦嶺在縣西北三十里

寶應山在縣西北四十里遞高七里連長治西火嶺乃秦嶺之北峰也雨則雲散於下霽則雲卧于上有甘泉傍有古洞相傳寶應寺僧修寺取物料洞中寺成擁石閉洞化此

黃沙山在縣北十里高三里盤踞七里北接蒲水一名天一山又名太乙山

聖宮山在縣北二十里壺關界西南有蒲水流合丹河嵩山在縣東北三十里接佛山五里

六泉山在縣東北四十里上有六泉自山半六泉洞中  
出

佛山在縣東北四十里矗高三里太行絕頂文翔鳳曰  
俯視中州九千四百八十仞

熊耳山在縣東北四十里連六泉山雙峰峭對若熊耳  
然月自峽中吐出

一斗水在縣東九十里山石上用之旋盈不用亦不溢  
可容斗許接河南輝縣

平田水在縣東南九十里源出孤峰山下流注河南輝  
縣入於衛

瀑布泉在縣東南百里懸崖瀉下似飛烟之輕漾一  
名鯉池

西溪在縣西南四里發源鳳山之麓

雙泉在縣西南四十里二井一甘一苦

清涼泉在縣西南六十里元好問曰陵川峙太行之巔  
天壤間清涼界也

義井在縣西二十里汲以序

蒲水在縣北二十里發源聖宮山西南流入長平丹河  
東接壺關馬鞍山

浙水在縣東北四十里經壺關界東南流入縣境又東  
流入河南林縣注於滏陽

落雁池元郝經故第側擬汴金明池也 郝文忠充國  
信使北還之歲汴中民射雁金明池得帛書云霜落  
風高忠所如歸期回首是春初上林天子援弓繳窮

海累臣有帛書中統十五年九月一日放雁獲者勿  
殺國信大使郝經書於真州忠勇軍營新館是時南  
北隔絕不知中統之久改至元也又文忠儀真館中  
雜題持節江頭久食魚館人供雁意踟蹰呼兒細看  
雲間足恐有中原問訊書則故第之名落雁池也固  
宜事詳元史及  
宋濂題後王逢讀國信大使郝公帛書詩注公  
羈旅日有以雁四十餉公內一雁體質稍異命畜之  
於後雁見公輒張翮引吭而鳴公感悟擇日率從者

二十七人具香北拜二人舁雁蹠其前手書尺帛親繫雁足且致祝曰累臣某敢煩雁鄉通信朝廷雁其保重欲再拜雁奮身入雲而去未幾虞人獲之於苑中以所繫帛書託近侍以聞上惻然曰四十騎留江南曾無一人雁比乎遂進師南伐越二年宋亡書今藏諸秘監河南主客劉澹齋云

六泉出六泉洞

甘泉在寶應山味甘如飴



沁水縣

龍岡在縣東二里

夫妻嶺在縣東十五里迤東三十里連仙翁山嶺上高峰為尖山山東數十里有紫沙門相傳夫妻挽車力窮而斃張昌詩夫妻推車上長坂化為兩鳥常相偶

楊榭復授建州刺史鎮車廂及齊神武圍玉壁別令侯景趣齊子嶺榭恐入寇邵郡率騎禦之景聞榭至斫木斷路者六十餘里猶驚而不安遂退還河陽

拾崇凹嶺在縣東十五里連將軍腰小堯嶺

馬邑山在縣東二十里金志沁水有鹿臺山沁水馬邑

山 通考有沁水鹿臺山馬邑城

偃月山在縣東三十里一名車輞山

峰岳山在縣東四十里上有峰岳寺

三皇嶺在縣東五十里

紫金山在縣東五十五里

仙翁山在縣東六十里東南三十里連子沙腰東十五

里連榼山高壓羣岫繇仙翁而東南高峰倏峙是為  
三纏凹

三纏凹在仙翁山東南距縣七里有奇明崇禎六年  
三月丙午山西兵擊賊於陽城北張道濬設伏於三  
纏凹賊至伏起擊之斬其魁生擒賊首滿天星闖王  
賊大奔巡撫許鼎臣獻俘闕下奏道濬功第一按此  
闖王非高迎祥也

熊耳山在縣東六十里繇佛廟嶺而東兩山高峙

佛廟嶺在縣東六十里

林村嶺在縣東六十里

鳳凰山二一在縣東七十里連大尖山高峰迤東連岳陽浮山界相傳秦始皇斬絕二十餘步一在縣東北十五里

孤山在縣東八十里一名筆山邑人常評事倫十五歲著筆山賦曰山形靈山色磻驅神兵加斧鑿

榼山在縣東九十里清泉飛閣松栢參霄白松三左二

圍一丈五尺右一差小高脊數丈膚理瑩膩似雪山  
中萬松皆然此其巨者耳明張五典三松說曰密縣  
白松彼一此三其數不敵也今存二

金山在縣東九十里古端氏城西南

卧牛山在縣東百里一名大嶺橫亘十餘里上有西子  
梳洗臺東北為欄杆嶺又東下陡立一峰名散石臺  
文筆峰在卧牛山東一名華蓋

嵬山在縣東百里羣山綿延一名隗山 唐志端氏有

隗山按山在古端氏城東勢甚峻巔有浮圖下有九龍祠

西岳神山在縣東百一十里山麓有賈封鎮在賈封者為西岳神在湘峪者為東岳神

岳神山在縣東百二十里鳳臺界高十里迤東北四十里連老馬嶺山麓為湘峪村 張慎言勒石曰肫岳

樊山在縣東百二十五里山後即可樂山 午亭詩注

樊山一名芙蓉九藥山 陳廷敬老姥掌游記上黨

南三百里有山曰方山又南十五里曰洞陽山又南十五里曰樊山三山高出地上皆直下萬仞繇樊山則枝分條披為峰為壑為澗為峒為峯為巒為岫為巖其又南則砥柱析城巖壁重複如樓堞如墉隍如玦如環繚絡數百里其中長川夾岸若斷若連蓋陟樊山之巔皆見焉樊溪東涇在山之南有曰老姥掌數十里之內聯嵐亘輝俯可搏擷如置諸掌昔以掌名肖其形矣

元天洞在縣東一百三十里燕丹此石上

吳山在縣東百四十里山半有賈寨迤邐至東北為蟠龍嶺上有馬跑泉

空倉嶺在縣東百五十里高平界相傳秦白起詭運米置倉於此以給趙括

老馬嶺在縣東百五十里高平界迤北五十里連秋峪嶺

鵬黃嶺在縣東百六十里長子界崔府君蹟見搜神記



秋峪嶺在縣東百七十里高平長子界迤北三十五里  
連宇峻嶺

子沙腰在縣東南八十里連方山南十五里連眼子腰  
梁家莊陽城界下有沁河

石樓山在縣南二里峻嶒萃律形似樓臺山半舊有石  
樓後廢下有濯纓泉入杏谷水 何景明石樓賦沼  
清溪跨絕澗控天梯鈎石棧羅羣山於膝下挺層臺  
於天半 彭甫六柳莊記沁之南一里許有山曰石

樓林巒峭壁川原奧衍其畔有田田有泉自地湧出  
清冽可愛

鹿臺山在縣南二十五里迤東北二十里連石樓山御  
屏山又迤東二十餘里連夫妻嶺高峻陰森夏日積  
雪山有文石岡雙蟾嶺巔上時聞仙樂聲 水經注  
陽泉水出鹿臺山山有水淵而不流 王暉鹿臺山  
詩注在澤州沁水縣南二十里時被安西王命伐石  
於此詩曰遠尋文石岡來歷南山纏鹿臺臺為山幽

徑蟠古篆後峪行未盡前嶺已當面行經雙蟾嶺石  
怪驚變現闖首榭樹間氣自太古練 山海經有鳥  
狀如雄雞人面名曰鳧溪

小堯嶺連鹿臺山

御屏山在縣西南二里形似屏

南陽仙洞在縣西南五十里南陽村南山洞名仙人碣  
洞口闢虛牖石蓮倒垂進數武石雲層湧色蒼白又  
百武洞高至五六丈廣半之有石林石龜石龍石獅

石象又一里有石蓮臺石佛石鼓擊之聲徹洞外後  
有竇時聞風濤聲云

鳳原岡在縣西半里高二里連玉嶺高峰繚玉嶺迤邐  
而下平岡袤衍一名平原嶺水環抱

玉嶺在縣西五里迤西袤三十里連東塢嶺繚東塢嶺  
東南而下起伏蜿蜒至此突峙峻峰俯挹羣岫有澗  
曰龍池

烽燧嶺在縣西二十里明初駐師於此

漢嶺在縣西三十里保義村相傳漢光武討銅馬賊  
經此

杏谷在縣西三十里

天子嶺在縣西三十里保義村東南相傳蕭王討銅馬  
經此

阜山在縣西四十里隋書名輔山 五朝志沁水有輔  
山 金主簿瓜爾佳陞擒賊常文憲作阜山戰勝傳

歷山在縣西五十里有舜廟廟側有瀉汭二泉北有大

洪池小洪池西北有陶壑 谷幽榛密民居數少

黃士洞在歷山西內有丹竈石牀

丹坪山在縣西六十五里白華村有下疊中疊上疊上  
疊有泉巔有平地三十畝山下為丹溝岳將軍七砦  
之一

關子門在縣西翼城界東南十餘里連拾崇凹嶺

東烏嶺在縣西北四十里南連關子門杏水源嶺麓

地理志名黑嶺避宇文諱易今名 縣志穆天子傳

鉞隘即此二山

山西郡縣志多書  
鉞隘胥涉傳會

碧峰山在縣北三里迤高四里盤踞五里東連鳳凰山  
又東連車輞山至河頭村下有沁河西十餘里連清  
風嶺高峰又十餘里連東塢嶺峭壁茂林建五龍神  
廟有靈泉東崖有榭樹鼓掌聲應一名驚雞樹

大尖山在縣東北二十里東數里一岡橫亘北跨岳陽  
浮山二縣袤五十餘里名橫嶺鶴鳴老人圖記曰長

城

三尖山在縣東北三十里三峰並峙

宇峻山在縣東北百里長子界古名巨峻山 五朝志

瑞氏有巨峻山 金志瑞氏有石門山巨峻山 迤

北三十里連鵬黃嶺迤南折六十八里連佛廟嶺又

西南三十里連三皇嶺嶺下乃鄭莊也

洪谷唐洪谷子荆浩字浩然隱太行洪谷工丹青尤長

山水為唐季之冠所謂荆關董巨也

石門山



沁河在縣東十五里源出沁源縣綿山經岳陽縣東大  
匠村入縣界大將村西南流經佛廟嶺紫金山間又  
經三皇嶺車輞山間凡五十餘里至鄭莊村又南合  
梅河又東南流五十里至端氏鎮又南流三十餘里  
至武安鎮入陽城界西南流百五十里至河南濟源  
縣境復折而東經河內武陟入黃河 水經注沁水  
又南與羈羈水合水出東北巨峻山乘高瀉浪觸石  
流響世人因聲以納稱西南流注於沁沁水又南與

秦川水合水出巨峻山東帶引衆溪積以成川又西南逕端氏縣故城東昔韓趙魏分晉遷晉君於端氏縣卽此是也其水南流入於沁水 金地理志濟源縣有太行山以沁水為界西為王屋東為太行 河有曲堤渡 鄭莊渡 武安渡 沁河在懷慶府城北二里 枋口水在濟源縣東北三十里兩山之間沁水經焉舊以枋木為門故名晉司馬孚壘石為之又名沁口 沁水自太行南出由枋口而東會堯王

泉水又東丹水注之 魏建義元年六月葛榮使其

僕射任褒率車三百餘乘南寇自沁水

梅河源出東烏嶺梅谷村東澗東流三十餘里合梅谷  
溝水名梅水又東流至縣東南合杏水又至河頭五  
十里入沁河

杏河源出東烏嶺陝溝村南澗南流三十餘里合杏谷  
溝水名杏水折而東十餘里合梅水

海子河源出秋谷嶺西南流至端氏入沁河

玉溪河源出空倉嶺西北流五十里至金峰東合海子

河

慈泉在樊山巔 陳廷敬慈泉銘序樊山之陽高千仞  
未至巔百步有泉在山徑沙石間坎甃清澈味甘冽  
異他水不盈不涸百鶴阡在其東故名慈泉

靈泉在筆峰山五龍廟內深尺許旱澇恒盈少汚輒涸  
虔禱輒應相傳飲之却疾云唐李端金李廣明陳清  
胥有詩

義井在縣西二十里義井村地少水一井味甘百里人  
以次而汲無敢少紊

蘆河在縣西四十里發源鹿臺山西流至陽城縣東十  
八里入沁河

可陶谿在歷山西北傳為舜作陶器地

龍潭在縣西北二十里

馬跑泉在漢封村內石崖上相傳蕭王馬跑地得泉  
濯纓泉

山西通志

山西通志

四

山西通志卷二十三